



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 3. redovnoj sjednici održanoj 24. februara 2021. godine, usvaja

ZAKON
O IZMJENI ZAKONA O SLUŽBENICIMA I NAMJEŠTENICIMA U SKUPŠTINI BRČKO
DISTRIKTA BOSNE I HERCEGOVINE

Član 1

U Zakonu o službenicima i namještenicima u Skupštini Brčko distrikta Bosne i Hercegovine (Službeni glasnik Brčko distrikta BiH, broj 8/19) član 81 mijenja se i glasi:

„Član 81

(Posebni slučajevi neplaćenog odsustva s posla)

- (1) Rukovodeći službenik, službenik i namještenik, ima pravo na neplaćeno odsustvo s posla od dana potvrđivanja njegove kandidature za javnu funkciju na koju se bira direktno ili indirektno, u bilo kojem zakonodavnom ili izvršnom organu na bilo kojem nivou vlasti u BiH.
- (2) Rukovodeći službenik, službenik i namještenik, ima pravo na neplaćeno odsustvo s posla u slučaju prihvatanja mandata ili imenovanja na javnu funkciju na koju se bira direktno ili indirektno, u bilo kojem zakonodavnom ili izvršnom organu ili na poziciji savjetnika, na bilo kojem nivou vlasti u BiH.
- (3) Rukovodeći državni službenik, službenik i namještenik ima pravo na neplaćeno odsustvo s posla u slučaju izbora na mandatnu poziciju vezanu za mandat gradonačelnika, mandatne pozicije rukovodećih državnih službenika u svim organima uprave i institucijama Distrikta, mandatno radno mjesto u Skupštini Distrikta, mandatno radno mjesto direktora i zamjenika direktora u pravnim licima čiji je osnivač Distrikt i mandatno radno mjesto direktora Ureda za prevenciju korupcije i koordinaciju aktivnosti za suzbijanje korupcije.
- (4) Za vrijeme odsustvovanja s posla iz stavova 1, 2 i 3 ovog člana, rukovodećem službeniku, službeniku, namješteniku, pripadaju prava iz radnog odnosa koja se odnose i na ostale slučajeve neplaćenog odsustva.
- (5) Rukovodeći službenik, službenik i namještenik, u slučaju iz stava 1 ovog člana a u slučaju neuspjele kandidature za javnu funkciju, može podnijeti pismeni zahtjev za vraćanje na isto ili slično radno mjesto u roku od trideset (30) dana od dana potvrde zvaničnih izbornih rezultata, u protivnom prestaje mu radni odnos.
- (6) U slučaju iz stavova 2 i 3 ovog člana, podnosi se pismeni zahtjev za vraćanje na isto ili slično radno mjesto u roku od trideset (30) dana od dana donošenja odluke o razrješenju, odnosno dana završetka mandata ili prestanka mandatne funkcije, odnosno radnog odnosa iz stava 3 ovog člana, u protivnom radni odnos prestaje.
- (7) Predsjednik Skupštine donosi rješenje o neplaćenom odsustvu s posla iz stavova 1, 2 i 3 ovog člana.

- (8) Predsjednik Skupštine je dužan da donese rješenje o vraćanju na posao, u roku od petnaest (15) dana od dana podnošenja zahtjeva iz stavova 5 i 6 ovog člana.
- (9) Rukovodeći službenik, službenik i namještenik, dužan je da se vrati na posao u roku od osam (8) dana od dana konačnosti rješenja iz stava 8 ovog člana.

Član 2

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-1022/21

Brčko, 24. 2. 2021. godine

PREDSJEDNIK
SKUPŠTINE BRČKO DISTRIKTA BiH
Mr. sci. Siniša Milić